

GUITS NE PXEEL PABL LO

ZHA EFÉS

1 ¡Diuzh to grëse to!

Naa nac Pabl, tib zha ne pxeel Jesús nonee Xtiidz me lo miech, sac ible Dios bnabey ne sca gaca.

Laa naa rxel guits rii lo to grëse to bets, grëse to bzian, zigne nose to guiedz Efés i, ne nac to zha ne ngable lo Dios niina ne tiblque laa to rliadz Jesús.

²Dios men ne nac Pxoze ne, ni Jesús men ndzon ne rnabey, me glu lo to guien to ganle pa lotaa noxco me to, ni me gacnien to ctsebd grë pe zhgab to.

³¡Gotsaa dzioolnie ne Dios, Pxoze Jesús, men ndzon ne rnabey ne! Sac gon, zha nactaa grë guielnzaac nroob ne bneedz Espíritu Sant lo ne niina ne laa ne ngab xnëz Jesús. ⁴Haxta zeene gard cue guidzliu, bzooblo Dios ne gac ne zha ne gdzin lo me zeene laa ne gliladz Jesús, gac ne tib miech peet xtold, zha ne gban zigne racladz me. ⁵Nquialadz me ne, gane bzooblo me ne gac ne xpëed me zeene laa ne gliladz Jesús, ib me sca bnabey gaca sac ib sca gola zdoo me.

⁶Mincoxe waa tibaque none dzioolnie ne Dios, sac gon zha wentaa me lo ne, pxeel me Xpëed me men ne nquialadz me ga, biaadgunlay me ne. ⁷Ne nligaa nquialadzdox Dios ne, gane pxeel me Xpëed me bzhiee xchen psilaa me ne lo grë dol ne ngadoo ne, been me ne perdon grë dol co. ⁸Ni led loxaque mincodse, sinque haxta bneedz me guielrien lo ne, bdixbiini me ne, ⁹ni bneedz me diidz gocndion ne pe nac mine no zdoo me, mine mese nan, mine nole me gun me. ¹⁰Sac niina laa ne ndionle: Grëse ncuaane no gbaa, ncuaane no guidzliu, tibaque gaca grëw ni Jesús gnabeya grësew; sca gaca zeene laa dze co gdzin.

¹¹Grëse ncuaane bnabeyle Dios no gac, run mew zigne racladz me. Gotsaa gwi ne ganle, glole bzooblo me ne ygaa ne grë guielnzaac ne nacle diidz gdeed me lo grë zha ne no xnëz me, guielnzaac ne bgaa ne zeene laa ne bziaab xnëz Jesús. ¹²Ni laa me bzooblo ne, zeena ne ne nac ne zha ne gloopaa psilo bnalo Jesús, cxobnen ne lo miech ganle pa lotaa men nroob nac me.

¹³Xquizh Jesús, ye to zeene laa to psilo pquaadiag diidzli, Diidz Ndzon ne nee ganle zha laa to lo dol, ni bliladz to cho nac Jesús, laa Dios pxeel Espíritu Sant lo to zig tib bey, bey ne rlu lole me ngab to; zigne bneele me glo. ¹⁴Ne znu pxeel me Espíritu Sant nacie ne, ga rlu ganle ib nli zгаа ne grë mine bneele me gdeed me lo grë zha ne ngab lo me, ni lëe min co ygaa ne zeene

gaḷ dze ne laa me blozh psilaa grë zha ne ygab lo me; zeena grë ne gleynie ne me por squitaa men nroob nac me.

Rnab Pabl guielbiini lo Dios

¹⁵Zeene gocnaḅ naa ne nlipaa dib zdoo to riladz to Jesús, ni ne nli nquialadz to grëraa miech ne no xnëz Dios, ¹⁶⁻¹⁷rded naa xquizh lo Dios.

Zeene rzodiidznietaa naa me, rsoladz naa to, rnab naa lo me gneedz Espiritu Sant guielbiini lo to guien to cho nac me, zeena lozh gunbey to me. (Lëë me nac xDios Jesús, lëë me nac Pxoꝝ ndzon ne.) ¹⁸Rnab naa lo me quixbiini me guic to, guien to ganle zha nactaa grë ncuaaḅe ygaa to ne laa me bredz to, guien to ganle zha ndzontaa, zha nontaa ncuaaḅe gdeed me lo grëse miech ne ngab lo me, ¹⁹ni guien to zha nroobtaa guielrnabey ne rap me, pa lotaa naca; lëë guielrnabey co nacie ne ne nac ne zha ne no xnëz me. Lëë guielrnabey co ga blu me ²⁰zeene bleeban me Jesús bzoob me me cue me gbaa, zaatne rieguaḷ sob me ne nac me men rnabey, ²¹bzo me me, me rnabey lo grëse zha ne rnabey, lo grëse zha ne non, ni lo grëragaa ncuaaḅe no; niicle niinaw, niicle len dze ne naragaa guiaada.

²²Grëse ncuaaḅe notaa, laa Dios psana ladznia me, ni bzo Dios me me rnabey lo grëse zha ne no xnëz me. ²³Sac grëse zha ne no xnëz me rrieequia xcuerp me ga nac zho, gacxe waa grëse zha ne nac cuerp co, zha none cxobnen ganle pa lotaa men nroob nac me. Tel pe lotaaw me nacie zho, sac grëtaa ncuaaḅe no ladznia me now.

Ne noxco Dios miech gane psilaa me zho

2 ¡Laa Dios bneedzle tib guielmban cub lo to niina, niicle ne ntseeb goc to glo! Goḷsoladz ganle, zeene scataa beenḅtal to xtol to, masaque nac to lo Dios hor co zig tib zha ne gutle, ²laa to güeynaḷ niapse grë ncuaaḅe ndzinlid ne rac lo guidzliu rii, been to grë miḅe rnabey ma ne rnabey lo mendox, ma ne rcheep grë zha ne ib nëd gon xtiidz Dios.

³Grëse ne sca wban ne glo, bionaḷ ne ncuaaḅe ndzinlid ne bzoobladztaa ne, bdziuuḅ ne ncuaaḅe bdeedtaa guxt xcuerp ngoopdoḷ ne, ncuaaḅe biaabtaa guic ne. Ni ne scataa nac ne, ib bioguaḷ ngaa ne lo guielnë dox ne cxeel Dios, lo guielnë ne noxtseeb grëraa miech niina.

⁴Per ne nquialadz Dios ne nac ne miech, gane pquia zdoo me ne, ⁵ni niicle ne rrieequia mengutle nac ne ne scataa quiadziuuḅ ne grë dol co, per bleeban me ne; lëë min co ga been me zeene bleeban me Jesús. ¡Laa me psilaa ne lo guielgut co, niapse por mezhah noxco ne! ⁶Laa me bleeban ne, zeena ygaa ne guiosiobnie ne Jesús zaatne gnabey Jesús.

⁷Zigtaa len dze riiw, zigtagaa len dze ne ziaadraaw, ga gan miech ganle pa lotaa nquialadz me ne, pa lotaa wen me lo ne, sac pxeel me Jesús biaadsilaa ne. ⁸Golgan ganle, ne wen me mezhah noxco guiaanwen miech lo me, gane rsilaa me ne lo dol zeene laa ne riladz Jesús dib zdoo ne; guiabd ne togo por pe guielwen ne gun ne laa me csilaa ne. Ible zdoo me ral rsilaa me miech, ⁹racda

ne por pe guielwen ne gun zho; zeena gdaannied zho guielwen ne run zho. ¹⁰Dios nac men ne psan ne, ni niina ne laa ne bziaab xnéz Jesús, laa me bredz ne dziuun ne gré guielwen ne racladz me, mine bzooblole me ne dziuun ne.

Grése zha ne ngab lo Jesús, tipse nac zho

¹¹Golsoladz ganle miech ngoopdol, miech ne ngabd lo Dios, miech beed, sca lè to lo gré zha Israel glo (sac zha, ne rio zho bey zigne rnabey xley zho, rzac zho miech wen, miech mbe nac zho, zha nac zha ne ngabpaa lo Dios). ¹²Len dze co gard ygab to lo Jesús, gard gac to tipse gré to zha Israel, led yede to no lo trat ne biaan Dios gré me zha Israel, nande to gré diidz ne psan me lo zho. Lega laa to mbanse, runbeyde to Dios, ni tib guielnzaac quiambéзде to ygaa to. ¹³Sangue niina ne laa to bzëëb xnéz Jesús porne bzhiee xchen me psanmbe me to, laa to ngable lo Dios.

¹⁴Jesús nac men ne psanwen ne gré ne, ptiche me grétaa ncuane pca zaacse ndzianlsa ne; zigtaa zha Israela, zigtagaa zha zita, tibaque been me ne lo me niina. ¹⁵⁻¹⁶Zeene pquia me lo cruz, gataa ptiche me gré ley ne zienal zha Israel, ne scataa rsanglaa zho zho; gane niina zigtaa zha Israela, zigtagaa zha zita, laa me been zho tipse, been me zho tib guiedz cub ne ngab lo me. Sca nac ne laa me psanwen zho gré zho, ni psanwen me zho néz lo Dios.

¹⁷Jesús nac men ne biaadnie Xtiidz Ndzon me lo ne grése ne, gocndion ne zha guiaanwen ne néz lo Dios, zigtaa tow ne nac to zha ne zit zo lo Dios glo, zigtagaa zha Israela ne nac zho zha ne gax zo lo me. ¹⁸Gane niina, niicle zha Israela, niicle zha zita, zrieelo ygab zho lo Dios men ne nac Pxoz ne, zeene laa Espiritu Sant gunquien zho none gbig zho lo me.

¹⁹Gacxe waa, tel to nacdrea to men zit niina, lole Dios ngab to, lal non to, lal nac to gré to grëraa zha ne ngab lo me.

²⁰Golguien ganle, grése ne niina gzoob ne nac ne zig tib yu ne noyaa, yu ne psilo gré zha ne pxeel Dios nonee xtiidz me lo miech niina, gré zha ne pxeelgaa me pteed xtiidz me lo miech padzeela, ni Jesús nac quie ne naaz yu co. ²¹Grése zha ne zienal mine rnabey me, rrieequia nosoquiaraa zho yu co ga, haxta guirew gaca tib yadoo ne nlipaa mbe néz lo Dios. ²²Zig nac to gon, tib tib to ne nac to zha ne ngab lo Jesús, ye to nac yadoo co, zaatne rbéz Espiritu chen Dios.

Pabl nac zha ne güeyseed zha zit

3 Ni ne bialnecxe naa Xtiidz Jesús lo to waa, gocnan to ne niicle men zit nac to zrieelo ygab to lo Dios, min co gane znu nioogyu naa nu. ²Nanlaxe to ganle ne wen Dios, laa me bzo naa gun naa dziin rii cseed naa gré men zit.

³Laa me blu lo naa zha nac gré ncuane no guic me gun me, mese nana per laa me blu lo naa zha naca, ni laa palala psilo bzetle naa lo to lo guits rii.

⁴Zeene glab tow i, dzigo guien to ganle ne nli nan naa zha nac gré mine gun Jesús, mine mese nan. ⁵Wlaltaa choot miech gocnanda, laa niina laa Dios pxeel

zhiEspíritu me bneedz guie|biini lo no gocndion now, zigtaa no ne nac no zha ne pxeel me nonee xtiidz me, zigtagaa grë zha ne pxeel me noteed xtiidz me. ⁶Ni znu naca: grëse zha zit, zгаа zho guie|nzaac ne rëb Dios gdeed me lo grë zha ne ngab lo me, tibaque nac guie|nzaac ne yгаа zho grë zho zha Israel. Niicle zha Israela, niicle zha zita, laa Dios quiambëz gdeed me guie|nzaac co lo zho, totsaque gliladz zho Xtiidz Ndzon Jesús.

⁷Niicle ne tib miech peet nond nac naa, per laa Dios bzooblo naa gne naa lo miech gacnan zho mine blozh bzet naa nu, me nacie naa, me rneedz grëtaa poder ne rap me parne grieelo gun naa dziin rii. ⁸¡Ncuaañe gzee zdoo new! Golwi ganle, naa nac tib zha ne mazdraa peet nond lo grë zha ne ngab lo Dios; per laa me bzooblo naa, naa bgaa dze ndzon rii gne naa Xtiidz Ndzon me nu lo grë zha zit, zeena gacnan zho ganle pe zhistaa grë guie|nzaac ne gdeed Jesús lo zho. ⁹Gne naa lo zho gacnan zho ganle zha nactaa grë mine no guic Dios gun me, mine wlaataa choot gard gacnan; Dios, men ne bzaa grëse ncuaañe no.

¹⁰Nana gnë to: “¿Pe nacie sca been me?” Laa me beena zeena grëse zha non, zha rnabey ne no gbaa, zeene gan zho tipse nac zha Israel grë zho zha zit ngab zho lo me, ga guien grë zha gbaa co ganle zha ndzielguictaa Dios. ¹¹Sca nac mine no guic me padzeela, ni zeene laa me pxeel Jesús laaw goc. ¹²Gacxe waa, niina ne laa ne ngable lo Jesús, peet lo ngadoodraa ne, niinasi zrieelo gbïg ne lo Dios, sac ndion ne zha ne rnalo Jesús ible scaania Dios zho.

¹³Laa naa rso diidz lo to sca, niicle ne znutaa quiadeed naa loxaque ne bialseed naa to, gunde to ne minriise laa zdoo to guiaa, sinque golley golwi ganle nu rlu zha nziuu, zha non nac to lo naa.

Nquialadz Jesús miech

¹⁴⁻¹⁵Zeene rsoladz naa grëtaa mine no guic Dios gun me, ni mine beenlegaa me (me ne nac me Dad lo grëse zha ne ngab lo me, niicle lo guidzliu nuw, niicle gbaagaaw); rded naa xquizh lo me. ¹⁶Ni ne squitaa ndzon, ne squitaa ncuaañe lozhd nac grëtaa guie|nzaac ne rap me, laa naa rnab lo me cxeel me zhiEspíritu me gneedz xfuerz to dziits so to. ¹⁷Ni rnab naa lo me tibaque dib zdoo to gliladz to Jesús, zeena scagaa tibaque gbannie to me, parne guien to ganle pa lotaa nquialadz me to. ¹⁸Ga guien to ganle grë to grëraa zha ne ngab lo me, ne nligaa pa lotaa nquialadz me to, nacda ncuaañe grieelo ctiix ne, guiab ne lalnuw. ¹⁹Ni niicle ne znu nacda ncuaañe grieelo guiab ne znu znu naca, per laa naa rnab lo me zig zie dze guienraa to pa lotaa rleynie Jesús to; zeena glu ganle ne nli nacie Dios to.

²⁰Ni Diossi gon ne nac me men ne ndzon, mazdraa ncuaañe grieelo gneedz me lo ne, lëdle mine riab guic ne rnab ne lo me; ni ncuaañe gaca gon, sac me nacie ne. ²¹Grëse ne ne nac ne zha ne no xnëz Jesús, tibaque golgotsaa gleynie ne me sca, ne squitaa ndzon me! Sca rieguiala.

None tipse gac zha ne riladz Jesús

4 Zigne rne naa ga, laa naa nioogyu nu loxaque ne ruṅ naa xtsiin meṅ ndzon ne rnabey, per laa naa rnab lo to zaacse goḷgac, goḷban zigne rieguiaḷ gban grē zha ne bredzle Dios ngab lo me, sac goṅ laa me bredzle to. ²Goḷgac tib miech ndooladz, tib miech wen, tib miech nlēëguicd, tib miech ne guieednied samiech sinque ine gleynie to zho. ³Wenle na ndxie to niina, ni Espíritu Sant nac meṅ ne gacnieṅ to; zeena tibaque squi tipse gac to. ⁴Sac goṅ tibaque cuerp nac ne grē ne, tibaque Espíritu nacie ne, ni tibaque nac miṅe ndioṅ ne gneedz Dios lo ne, ne laa me bredz ne. ⁵Tibaque meṅ ndzon ne rnabey ne, tibaque meṅ ne riladz ne, tibaque wrobnis ne no par grē ne ne dib zdoo ne riladz ne me; ⁶tibaque Dios no, me nac Pxoḷ ne grēse ne, me nac meṅ nroob ne zo lo ne, me racnieṅ ne grēse ne, ni me nacie ne.

⁷Tipse nac ne, per tib tib ne psose Jesús ne pe nac dziin ne grieelo dziuun ne lo me, zigne gola zdoo me. ⁸Min rii ga raquiet zaatne znu zhobnee lo guits ne ziaad Xtiidz Dios:

Blozhse psanwin me grēse zha ne rlēë raṅ me,

laa me biire zey gbaa stib;

ni psose me tib tib miech pe nac dziin ne grieelo guṅ zho lo me.

⁹Goḷgotsaa gwi ne ganle, Jesús raquiet nu, rneew “biire zey me gbaa stib”, ga rlu ganle tib meṅ ne biet gbaaw biaad me lo guidzliu. ¹⁰Sac me biet gbaa, ni biire zey me gbaa stib, zeena glu ganle tel pa lotaa zrieelo gdziṅ me. ¹¹Ni mezhaz rzo ne tib tib ne pe nac dziin ne dziuun ne; me rzo:

zha ne rxeeḷ me gnee xtiidz me,

zha ne rxeeḷ me cteed xtiidz me,

zha ne rienee Xtiidz Ndzon me tib tib lo miech zha laa zho lo dol,

zha ne rteedlo grē zha ne ngab lo me, ni

zha ne rseed zho zha nac Xtiidz Ndzon me.

¹²Laa me ruṅ miṅ co, sac laa me racladz grēse zha ne ngab lo me lozh xixcuaa lo xquieḷmban zho, zeena guieṅ zho zha guṅ zho xtsiin me; ¹³haxta gdziṅ dze ne tibaque miṅe gliladz ne grē ne, grēse ne dziuunbeyppaa ne meṅ ne nac Xpēed Dios. Laa ne lozh sodziits, haxta gac ne zig me.

¹⁴Gacdraa ne zig chol cho mēēdlaas ne beelze pe riladz; niicxe guiaad grē zha ne guiaadnie stib wseed, zha ndzinlid ne zombēz loxaque dieṅ zha gdeeda diidz yquidie zho miech; yquidied zho ne. ¹⁵Sinque guionaḷ ne miṅe nac diidzli, ine gleynie ne samiech ne, tibaque laa ne guionaḷ zigne nac Jesús, meṅ ne rnabey lo ne grē ne ne ngab ne lo me (rrieequia xcuerp me nac ne, me nac guic cuerp co). ¹⁶Ni ne me nac meṅ ne rnabey lo ne, me gnē zha gac tib tib dziin ne pso me ne dziuun ne; niicle ne nzian ne, per tipse gac ne dziuun ne dziin ne pso me ne, zeena xixcuaaraa lo xquieḷmban ne, ni lozh guieṅ ne zha gleynieraa ne samiech ne.

Guielmban cub ne rneedz Jesús

¹⁷Laa naa rso diidz lo to nu, ni golquiaadiaga zig nac zeene men ndzon ne rnabey ne rneew lo to: gbandraa to zigne mban grëraa miech ne zozit lo Dios, grë zha ne mban zigne notaa guic; ¹⁸sac tel zha, ncow nac guic zho. Gard yгаа zho guielmban ndzon ne rdeed Dios, nanđ zho zha nac guielmban co sacne ndip zdoo zho. ¹⁹Laa zho gocnadle, niapse lo grë ncuaañe ndzinlid no zho, ib rgobeyd zho run zho grëtaa guielyozh ne no. ²⁰Sangue to gon, ne nac to zha ne no xnëz Jesús niina, led mincod noseed to; ²¹telne nli noquiaadiag to ganle cho nac me, telne nli rien to zhiwseed me mine rlu ganle zha nac diidzli.

²²Miech yozh ne goc to glo, grëtaa ncuaañe ndzinlid, grëtaa guielyozh ne gocladztaa xcuerp to been to, įgolsaana! ²³None gdzëë lo xquielmban to, zigtaa grë mine no zdoo to, zigtagaa grë mine rza guic to, ²⁴golgac tib miech cub, zaacse golban, ndzinli golgac; zeena glu ganle ne nli beenncuble me to zigne racladz me.

²⁵Golguien sca, yquidiedraa to samiech to, sinque niapse mine nac diidzli golnee, sac gon tel ne pe nacne yquidielsa ne ni tibaque nac ne grë ne.

²⁶Telne glëë to, code to guielblëë co zdoo to dib dze, sac gon dol ga. ²⁷Gunde to mine racladz mendox.

²⁸Zha ne goc ngbaan, cuandraa zho, sinque gun zho dziin gdziniaa zho ncuaañe yquiiin zho, zeena scagaa grieelo gun zho xyudar zha ne guiend pe yquiiin.

²⁹Gneede to diidznë, sinque diidz ne ndzinli, diidz ne yquiiin golnee, zeena zha ne gona ine cchoobladza zdoo zho, ine yquiiina lo zho. ³⁰Golguien, gunde to ncuaañe coguiełnë to Espiritu Sant. Golgan ganle laa Dios pxeel me, nac me zig tib bey ne glu ganle ne nli lo Dios ngab to, gal dze ne laa me lozhpaa csilaa grë zha ne ngab lo me. ³¹None csaan to:

guielñialadz, tso to gow gzhiih zdoo to;
glëëdraa to,
sobzhiandraa to,
coredzdraa to,
gacntseebdraa to, ni
grëragaa guielntseeb ne no, gunde tow.

³²Sinque none:

wen gac to lo samiech to,
golquia zdoo samiech to,
golgun samiech to perdon, zigne beenaque Dios to perdon zeene laa to
beenbey Jesús.

None glu cho nac zha ne ngab lo Dios

5 To ne laa to nacle xpëed Dios ni nquialadz me to, goltsoxco gac to zig me. ²Zaacse golban, golleynie samiech to zigne rleynie Jesús to, sac gon

tel me, haxta bleeladz me me gut me xcuent ne, gut me biogon me lo Dios psanmbe me ne lo xtol ne, me goc tib gon ne pcaania Dios.

³Golguien sca, none glu to ne nli xnèz Dios no to;

gunde to grè guielyozh ne run grè zha ne zienald zigne nacpaa
guieltsieel,

gunde to grè ncuaane yozh ne run miech ndzinlid,

gunde to grè ncuaane run grè zha ne zienal loxaque dien zha gunlo
dimi.

Gunde to grè ncuaan co, per ni gzodiidzde tow.

⁴Gneede to grè diidzguidz,

gneede to grè diidz ne paat rquiind,

gneede to grè diidz ro nèz;

sac gon rdzieeldraa gnee to grè ncuaan co; sinque Dios golgoolnie, goldeed
xquizh lo me. ⁵Nanle to ganle, grèse:

zha ne zienaldraa zigne nac guieltsieel,

zha ndzinlid ne run grèraa guielyozh,

zha ne mbidz (zha ne rleynieraa dimi, laa ne gleynie zho Dios);

ni tib zho grielod gdzin zaatne rnabey Jesús grop me Dios.

⁶Gdeete to diidz lo zha ne gacladz yquidie to gnè zho peet nacd grè min
co, sac gon, grècxè min co waa run grè zha ne nèd gon xtiidz Dios, lozh ga,
lèè minè tsieguial zho laa zho ygaa lo guielzi ne csiaab me. ⁷Golguien sca,
yquiaadiagde to xtiidz grè zha ne sca rnee, per ni ctsieelsade to zho.

⁸Nli, jläë?, ndzinlid wban to glo, rrieequia lo ncow ga bio to, gocnie to
mendox; sangue niina ne laa to nacie Jesús men ne nac biini, rrieequia lo
biinile no to. Golguiena sca, zaacse golban, ⁹sac niina ne laa to nole lo biini,
none gac to:

tib miech wen,

tib miech ne zienal gac minè nac diidzli,

tib miech ne rnee diidzli.

¹⁰Goltsoxco guien to zha racladz Dios gban to. ¹¹Gandzede to grè ncuaane
ndzinlid ne run grè zha ne no lo ncow, sinque gollisquiw; ¹²sac grè ncuaane
run zho ngeets zhliaan, haxta ncuaane ctoladz ne gnee new.

¹³Grèse zha ne gbig lo biini co, zien zho ganle zha nactaa grè ncuaane yozh
ne noyun zho; sac gon telne biiniw, tsod ncuaane guianguets low. ¹⁴No tib
zaatne znu zhobnee lo Xtiidz Dios, rneew:

Luu ne tibaque guieel no luu, bleè mcaal lo luu;

briee lad grè zha ne squi nole ladznia guielgut,

zeena gban luu lo biini ne nac Jesús.

¹⁵Golguien sca:

Miech nixbiini golgac, ndzinli golban; gbande to zig chol cho grè miech
nxen ne run minè notaa guic.

¹⁶Cteed zhlède to xtse to lo ncuaane paat rquiind, niicle ne niapse grè min
co zienal grèraa miech len dze rii.

¹⁷Gunde to ncuaañe paat rquiind ne rza guic to, sinque golguien dien pa minpaa racladz Dios gun to, dzigo goltsoxco min co golgun.

¹⁸Gzudzde to, sac gon lo guielgonziu run miech ncuaañe nonguieldraa; sinque mazd golinab gneedzraa Espiritu Sant guielbiini lo to, zeena ine:

¹⁹gool to grè salm, grè himno, grè cant ne csiaab Espiritu Sant guic to; dib zdoo to goolgoolnie men ndzon ne rnabey.

²⁰Goldeed xquizh lo Dios men ne nac Pxoze ne, por grètaa ncuaañe ran to, ncuaañe rded to; golguien ganle lo Jesús ngab to.

Zha none gban zha ne riladz Jesús

²¹To ne nac to zha ne ngable lo Jesús, tib tib to golgon mine rnee zha ne nacgrè to, zeena glu ganle me nac men non lo to.

²²To ne nac to men wnaa ne ptsieelniale, golgon xtiidz tsieel to, zigne rioxcoque to ron to mine nac xtiidz men ndzon ne rnabey. ²³Sac ible tsieel to nac men ne no gnabey lo to, zigne Jesús rnabey lo grè zha ne no xnèz me (ni me psilaa zho lo dol, laa zho nac zig xcuerp me). ²⁴Ni zigne sca ron zho xtiidz me, scaque none gon to mine rnabey tsieel to to.

²⁵Togaa ne nac to zha bgui ne ptsieelniale, golleynie tsieel to, zigne rleynie Jesús zha ne no xnèz me. Tel me haxta bleeladz me xquielmban me, ²⁶blee me zho lo dol (ni biaanmbe zho zeene laa zho pquiaadiag xtiidz me, wban zhow ni brobnis zho; ²⁷zeena gal dze ne laa me ycaania zho, laa zho nacle miech ne rieguial gdzin lo guielndzon ne no me, ni tib dol rapdraa zho, miech mbele nac zho, zig tib lè lar nquitsbie ne ni tib pxud neyd). ²⁸Sca nagon none gun to, none gantsi to tsieel to zigne rantsi to xcuerp to. Mgui ne rantsi tsieel, rriequia xcuerp zho ga rantsi zho; ²⁹sac gon, tsod tib zha ne lèëque zha csacsi xcuerp zho, sinque ran zhow. Ni scadaa nagon rzac Jesús grèse miech ne ngab lo me, ³⁰sac nac zho zig xcuerp me. Ni lèë tib lè cuerp co nu nac ne.

³¹Zha ne pcatsieel-le, ible tibaque cuerp nac zho grop zho, laaw zhobneeque lo Xtiidz Dios zaatne rnee: “Ib none greezhaa mgui lo pxoze zho, lo xnias zho, zeena gbannie zho tsieel zho gac zho zig tibaque miech grop zho.” ³²Rgobey naa ngan tsoquic to zha nacle chop miech gac tibaque cuerp; per ga gon rlu ne niicle nzian ne per tibaque cuerp nac ne, ni lèë xcuerp Jesús ga. ³³Mine racladzpaa naa csoladz to nu: to ne nac to men bgui, none gleynie to tsieel to zigne rleynieque to xcuerp to; ni niicle togaa ne nac to men wnaa, none gon to xtiidz tsieel to, cueede to xquielto zho.

6 To ne nac to mèed, golgon xtiidz pxoze to, xtiidz xnias to, sac sca nonguiela, ni scagaa glu ne nli rleynie to Dios. ²Golgan ganle, lo grè xley Dios no tib mine znu rnee: “Bin xtiidz pxoze luu, xtiidz xnias luu, zeena ine niowse gac lo xquielmban luu, ni nroob dze ne gban luu lo guidzliu rii.” Ni lèëw glopaa rnee ganle pe nac mine ygaa zha ne gun mine rnabeya, ³sac rnew, niowse gac lo xquielmban zho, ni nroob dze ne gban zho lo guidzliu rii.

⁴Togaa ne nac to meṅ nguzan, gunde to ncuaaṅe yquiaaguieṅṅe to xpēed to, sinque golcobey dien zha gun to parne gon zho diidz, ni cseed zho gban zho zigne rdziladz Dios.

⁵To ne nac to zha ne ngadoo lадznia beṅ, golgon xtiidz meṅ ne rnabey to. Golguien zha rnabey to, dib zdoo to, goltsoxco golgun xtsiin zho, zig nac zeṅṅe xtsiin Jesús ga noyun to. ⁶⁻⁷Gunde to ne loxaque zeṅṅe zose zho lo to, dzigose yquiaalo to gun to dziin zeṅṅa guiannziuu to lo zho, sinque ine nguieel golgac golgun xtsiin zho, zig nac zeṅṅe xtsiin Jesús ga quia to, ine dib zdoo to quiayun to miṅe racladz Dios. ⁸Benque nanle to, zigtaa zha ne ngadoo lадznia beṅa, zigtagaa zha ne rnabeya, zdeedse Dios miṅe tsieguial zho tib tib zho tel pe nac ncuaaṅe wen ne noyun zho.

⁹Togaa ne nac to zha ne rnabey, niowse golgac lo zha ne quia xtsiin to, gacntseebde to lo zho. Golguien ganle, zigne rzacaque zho, scaque rzac to, no tib meṅ ne rnabey to grē to, lēe me ga zob gbaa; ni tel me gon led yed me guiab dien cho rnabey, chogaa run dziin.

None nsin so zha ne rliladz Jesús

¹⁰Bets, bzian, nu ne laa naa csiaalle, laa naa rnab lo to gon tibaque gólnalo Dios; golgan ganle, con grētaa guieṅrnabey ne rap me, me gneedz grē lose fuerz lo to. ¹¹Zig nac grē menguiib, ible no grē ncuaaṅe rquiin zho zeṅṅe laa zho rie lo diṅ, scaque to niina nagon, golquiin grē lose fuerz ne bneedz Dios lo to, zeṅṅa glēbd mendox gungüet ma to. ¹²Golgan ganle, led-xe miech guidzliud waa nodiṅnie ne, sinque laa ne nodiṅnie grē me yozh ne quianzē zhan gbaa, ma ne quianabey grētaa guieṅntseeb ne rac lo guidzliu rii. ¹³Gane nagon none yquiin to grēse lo fuerz ne zineedzle Dios lo to, zeṅṅa guiablode to zeṅṅe laa grē me ntseeb co csilo ygaal to; ni scagaa, zeṅṅe laa ma biablo, tibaque dziits so to grē to.

¹⁴Dziits sca golso:

Dziits golso lo miṅe nac diidzli, zigne dziits dziits rzhidoo len menguiib zeṅṅe laa zho tsie lo diṅ.

Golgun miṅe nonguiel zeṅṅa ctse to lo mendox, zigne rtse ncuaaṅe racw menguiib lo grē ncuaaṅe gnitlo zho.

¹⁵Nsin golso zeṅṅe laa to tsienee Xtiidz Dios lo miech gacnan zho zha guiaanwen zho lo me, zigne nsinle zo menguiib zeṅṅe laa zho no tsie lo diṅ.

¹⁶Guiaanladzde to, gólnalo Dios, zeṅṅa peet grieelod gun grē me yozh co to, zigne rnalo menguiib guieṅblag ne rsaac zho lo zha ne nodiṅnie zho.

¹⁷Golsoladz ganle laa Dios psilaale to lo guieṅgut, golsaca zigne rzac menguiib pchog guieṅ ne rzob guieṅ zho, rsilaaw zho lo guieṅgut. Ni golsac Xtiidz Dios miṅe rneedz Espiritu Sant lo to, zigne rzac menguiib xquiib zho.

¹⁸Nsin sca golso, guiablode to. Tibaque golzodiidznie Dios. Gólnab lo me miṅe rsiaab Espiritu Sant guieṅ to, gólnab gacniṅ me grēse zha ne ngab lo me; ni ¹⁹gólnab lo me gacniṅ me naa, csiaab me guieṅ naa pe nac miṅe gne naa,

peet dzeb tsod lo naa gne naaw lo miech; zeena gacnan zho ganle, zha nac Diidz Ndzon ne rnee zha laa miech lo dol, mine choot gocnand glo.

²⁰Ib me bzo naa cteed naa xtiidz rii me lo grë zha zit, ni mincocxe waa rquiaqui znu no grë guiib rii nia naa, ngoguiu zho naa nu. Golnab lo me gacnieñ me naa, gdzieebd naa gne naa ganle cho nac me. ¡Nsin sca golso!

²¹Laa naa rxel Tic lo to, me nac tib men nziuu lo naa, dib zdoo me laa me quiayun xyudar naa lo xtsiin men ndzon ne rnabey ne. Me guiaadnie diidz lo to ganle zha rac naa, zha no naa nu. ²²Mincopaa ziaad me i, ziaadnie me diidz zha no no nëz rii, zeena ine gley to tsoxcoraa to mine riladz to.

²³Rnab naa lo Dios men ne nac Pxoze ne, ni lo Jesús men ndzon ne rnabey, me gacnieñ to peet zhgab ctsebde to, ine tibaque gliladz to me, ine gleyne to samiech to. ²⁴Me gunlay to, grëse to ne nac to zha ne nlipaa dib zdoo rleyne Jesús. *Pabl*